

V თავი

სტუდენტის აკადემიური რეგისტრაცია და დატვირთვა

„სასწავლო პროცესის მარეგულირებელი წესის დამტკიცების შესახებ“ ბსუ-ს აკადემიური საბჭოს 2015 წლის 8 ოქტომბრის N111 დადგენილებაში (წინამდებარე გზამკვლევის დანართი N2) მოცემულია სტუდენტის აკადემიურ რეგისტრაციასთან და სემესტრულ აკადემიურ დატვირთვასთან დაკავშირებული რეგულაცია.

ბსუ-ში სასწავლო წლის (სემესტრების) დაწყებისა და დასრულების, სასწავლო წლის შეუფერხებლად წარმართვისთვის მოსამზადებელი სამუშაოების შესრულების, ასევე აკადემიური და ადმინისტრაციული რეგისტრაციის ვადები განისაზღვრება ბსუ-ს აკადემიური საბჭოს დადგენილებით/ბსუ-ს რექტორის ბრძანებით და ქვეყნდება ბსუ-ს ოფიციალურ ვებგვერდზე, ველში - „სწავლა“ და „აკადემიური კალენდარი“ (2020-2021 სასწავლო წლისათვის იხილეთ ბსუ-ს აკადემიური საბჭოს 2020 წლის 6 აგვისტოს N44 დადგენილება და ბსუ-ს რექტორის 2020 წლის 27 აგვისტოს N01-02/108 ბრძანება).

სასწავლო წელი 2-სემესტრიანია. თითოეული სემესტრი მოიცავს 19 კვირას, საიდანაც:

ა) 15 კვირა ეთმობა სააუდიტორიო მუშაობას, მათ შორის ერთი კვირა - შუალედურ გამოცდებს; ბ) 3 კვირა - ძირითად საგამოცდო სესიებს; გ) 1 კვირა - დამატებით საგამოცდო სესიებს (სასწავლო პროცესის საჭიროების შემთხვევაში აკადემიური საბჭო უფლებამოსილია განსაზღვროს სააუდიტორიო მუშაობისათვის კვირათა განსხვავებული რაოდენობა).

სასწავლო კურსი (საგანი) ერთსემესტრიანია. კონკრეტული სასწავლო კურსის/მოდულის გეგმით გათვალისწინებული კრედიტების ათვისების პირობები განისაზღვრება სასწავლო კურსის სილაბუსით, რომელიც წინასწარ ცნობილი და ხელმისაწვდომია სტუდენტებისთვის.

საგანმანათლებლო პროგრამის მოთხოვნების შესრულების მიზნით, სტუდენტმა წინა სემესტრის საგამოცდო პერიოდის დასრულების შემდეგ უნდა გაიაროს მომდევნო სემესტრის აკადემიურ რეგისტრაცია, რაც გულისხმობს ელექტრონულად (სასწავლო პროცესის მართვის ელექტრონული სისტემის მეშვეობით) ძირითადი პროგრამით გათვალისწინებული სასწავლო კურსების/მოდულების შერჩევას და შესაბამისი კრედიტების დაგროვებაზე ვალდებულების აღებას. სტუდენტს უფლება აქვს, შესაბამისი საფუძვლების არსებობის შემთხვევაში (დასაბუთებული განცხადების წარმოდგენისას), მხოლოდ ერთხელ შეიტანოს ცვლილება ელექტრონული რეგისტრაციის ფორმაში, მაგრამ სემესტრის დაწყებამდე არაუგვიანეს 2 კვირისა.

დამატებითი სპეციალობის არჩევა სტუდენტის მიერ უნდა განხორციელდეს არაუგვიანეს მე-4 სემესტრის ბოლოს, ძირითად საგამოცდო პერიოდში. დამატებით სპეციალობაზე რეგისტრაციისათვის სტუდენტი მიმართავს სასწავლო პროცესის დეპარტამენტს/სტუდენტთა კარიერული განვითარების, კულტურისა და სპორტის დეპარტამენტს. ამ სტრუქტურული ერთეულის წარდგინების საფუძველზე გამოიცემა ბსუ-ს რექტორის ბრძანება სტუდენტთა დამატებით სპეციალობაზე რეგისტრაციის შესახებ. სტუდენტის მიერ დამატებითი სპეციალობის ფარგლებში დარეგისტრირებული სასწავლო კურსები/მოდულები აისახება სასწავლო პროცესის მართვის ელექტრონულ სისტემაში. **არჩეული დამატებითი სპეციალობის შეცვლა ან გაუქმება დასაშვებია** სასწავლო პროცესის (სემესტრის) დაწყებამდე არაუგვიანეს 2 კვირისა.

სტუდენტი უფლებამოსილია ასევე: არჩევითი სასწავლო კურსი/მოდული, რომელიც აირჩია და გაიარა წინა სემესტრში, მაგრამ ჩაიჭრა, შეცვალოს იმავე ოდენობით კრედიტის მქონე სხვა არჩევითი სასწავლო კურსით/მოდულით; შეფასების გაუმჯობესების მიზნით ხელახლა დაარეგისტროს და ისწავლოს იგივე სასწავლო კურსი, ასეთ შემთხვევაში სტუდენტს საბოლოო შეფასებად უფიქსირდება უკეთესი შედეგი. ამ უფლებებით სტუდენტი სარგებლობს სასწავლო წლის განმავლობაში ასათვისებელი კრედიტების ზღვრული ოდენობის ფარგლებში და შესაბამისი საგანმანათლებლო პროგრამის სასწავლო გეგმით გათვალისწინებულ ოპტიმალურ ვადაში (მაგალითად: საბაკალავრო პროგრამის შემთხვევაში - 8 სემესტრის განმავლობაში).

სტუდენტს, უფლება არ აქვს დაარეგისტროს სასწავლო კურსი/მოდული, თუკი მისი შესწავლის წინაპირობაა კურსი/მოდული, რომელშიც ექნება უარყოფითი „(F) ჩაიჭრა“ შეფასება, ხოლო მე-4 სემესტრის მაგისტრანტი, რომელსაც აქვს აკადემიური დავალიანება სასწავლო კომპონენტის სახით, უფლებამოსილია მიმდინარე/ამავე სემესტრში დაარეგისტროს იგი კვლევით კომპონენტთან (სამაგისტრო ნაშრომის შესრულება) ერთად, იმის გათვალისწინებით, რომ ერთ სასწავლო წელში ათვისებული კრედიტების რაოდენობა არ აღემატებოდეს 75 კრედიტს. ასეთ შემთხვევაში მაგისტრანტი უფლებამოსილია გაიაროს სამაგისტრო ნაშრომის აპრობაცია, თუმცა სამაგისტრო ნაშრომის დაცვაზე მისი დაშვება განისაზღვრება მას შემდეგ, როცა სრულად ექნება შესრულებული სასწავლო კომპონენტი.

სასწავლო კურსში/მოდულში „(F) ჩაიჭრა“ შეფასების მქონე სტუდენტი, დავალიანებული სასწავლო კურსის ხელახლა გავლის/დარეგისტრირების მიზნით, ვალდებულია მიმდინარე წავლის საფასურის გადახდისათვის დადგენილ ვადებში დამატებით გაიაროს აკადემიური და ადმინისტრაციული (ფინანსური) რეგისტრაცია.

სტუდენტის სასწავლო საქმიანობის შესაფასებლად გამოიყენება კრედიტი - ერთეული, რომელიც გამოხატავს სტუდენტის მიერ საგნის ასათვისებლად შესასრულებელი სამუშაოს მოცულობას გამოხატულს დროის ერთეულში - საათებში. ერთი კრედიტი მოიცავს 25 ასტრონომიულ საათს, საიდანაც არაუმეტეს 10 საათისა არის საკონტაქტო,

ხოლო დანარჩენი - დამოუკიდებელი სამუშაო (ცალკეულ სპეციალობათა სპეციფიკიდან გამომდინარე, დასაშვებია კრედიტში საკონტაქტო და დამოუკიდებელი საათების განსხვავებული თანაფარდობა).

სტუდენტის სავალდებულო დატვირთვა ერთი სასწავლო წლის განმავლობაში მოიცავს 60 კრედიტს. დასაშვებია სასწავლო წლის განმავლობაში არაუმეტეს 75 კრედიტის დარეგისტრირება. მაგისტრატურის და დოქტორანტურის საგანმანათლებლო პროგრამის არასრული დატვირთვით განხორციელების შემთხვევაში ერთი აკადემიური წელი მოიცავს საშუალოდ 30 (ECTS) კრედიტს. კრედიტების განაწილება ხდება საგანმანათლებლო პროგრამის ყველა კომპონენტს შორის (როგორიცაა მოდული, სასწავლო კურსი, პრაქტიკა, საბაკალავრო /სამაგისტრო ნაშრომი და სხვ.).

სტუდენტის აკადემიური დატვირთვა მოიცავს:

ა) დარეგისტრირებულ სავალდებულო და არჩევით კურსებზე (ლექციებზე) დასწრებას, სამუშაო ჯგუფში მუშაობას, პრაქტიკულ ან/და ლაბორატორიულ მეცადინეობას; ბ) დამოუკიდებელ მეცადინეობას; გ) სასწავლო, სამეცნიერო, შემოქმედებით ან საწარმოო პრაქტიკას; დ) გამოცდების მომზადება-ჩაბარებას; ე) სასწავლო-სამეცნიერო(მოხსენება კონფერენციაზე, სამეცნიერო სტატია, საბაკალავრო, სამაგისტრო, სასემინარო)ნაშრომზე მუშაობას; ვ) ბსუ-ს კლინიკაში ან ლაბორატორიაში მუშაობას; ზ) შემოქმედებით პროექტზე მუშაობას.

დასაშვებია საბაკალავრო საგანმანათლებლო პროგრამების მე-3 სასწავლის წლის სტუდენტებისათვის პროგრამით დაგეგმილი შორეული საველე პრაქტიკის გავლის (სასწავლო კომპონენტის-5 კრედიტის შესრულების) გადავადება ერთჯერადად, ერთი სასწავლო წლის ვადით (მომდევნო სასწავლო წლის სტუდენტებთან ერთად გავლის პირობით). ასეთ შემთხვევაში, სტუდენტის მიერ ბოლო სასწავლო წელს ათვისებული კრედიტების რაოდენობა არ უნდა აღემატებოდეს 75 კრედიტს. გადავადების შესახებ სტუდენტის განცხადებისა და ფაკულტეტის დეკანის წარდგინებით გამოიცემა ბსუ-ს რექტორის ბრძანება.